

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, broj: 7/97 i 3/99 i “Službene novine Tuzlanskog kantona”, broj: 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____, donosi

ZAKON **o izmjenama i dopunama Zakona o visokom obrazovanju**

Član 1.

U Zakonu o visokom obrazovanju („Službene novine Tuzlanskog kantona“, broj 7/16, 10/16, 5/17, 15/17, 15/19 i 9/20) u članu 2. stav (1) tačka m) iza riječi „umjetničko-nastavna“ dodaje se riječ „podorganizaciona“.

Iza tačke mm) dodaju se nove tačke mn), oo) i pp), koje glase:

„nn) Naučna oblast sistematizuje naučna polja, a pod naučnim oblastima u smislu primjene ovog zakona ubrajaju se: prirodne nauke, humanističke nauke, društvene nauke, medicina i zdravstvene nauke, poljoprivredne nauke i inženjerstvo i tehnologija;

oo) Naučno polje (naučno područje) obuhvata više užih naučnih oblasti;

pp) Uža naučna oblast (naučna grana) obuhvata više naučnih disciplina ili posebnih nauka;“.

Član 2.

U članu 3. u prvom redu iza riječi „je“ dodaje se riječ „neprofitna“, a iza riječi „društvenog“ dodaju se riječi „i strateškog“.

Član 3.

Iza člana 8. dodaje se novi član 8a. koji glasi:

„Član 8a.

(Savjet za visoko obrazovanje)

(1) Za područje Kantona uspostavlja se Savjet za visoko obrazovanje (u daljem tekstu: Savjet), u cilju razvoja i unaprijeđivanja visokog obrazovanja na području Kantona.

(2) Savjet imenuje Vlada Kantona, na prijedlog ministra, na mandat od četiri godine.

(3) Savjet broji sedam članova, a čine ga:

a) jedan predstavnik Ministarstva;

b) pet predstavnika visokoškolskih ustanova sa sjedištem u Kantonu, od čega minimalno tri predstavnika javne visokoškolske ustanove;

c) jedan predstavnik privrede;

(4) Savjet obavlja sljedeće poslove:

a) analizira stanje i dostignuća u visokom obrazovanju i daje prijedloge Vladi Kantona i Ministarstvu za poboljšanje stanja u oblasti visokog obrazovanja na području Kantona,

b) daje mišljenje o visini sredstava potrebnih za razvoj javne visokoškolske ustanove,

c) daje mišljenje o predloženim kvotama o broju studenata za upis u prvu godinu prvog ciklusa studija na visokoškolskim ustanovama koje djelatnost visokog obrazovanja obavljaju na području Kantona,

d) daje mišljenje o studijskim programima u postupku licenciranja studijskih programa,

e) daje mišljenje na propise iz oblasti visokog obrazovanja,

f) daje mišljenje o prijedlogu strategije razvoja visokog obrazovanja,

g) saraduje sa ustanovama visokog obrazovanja u cilju obezbjeđivanja i unapređivanja kvaliteta,

h) vrši i druge poslove po nalogu Vlade Kantona i Ministarstva.

(5) Rad Savjeta bliže se uređuje poslovníkom o radu, koji donosi Savjet uz saglasnost Ministarstva.

(6) Savjet o svom radu podnosi Vladi Kantona godišnji izvještaj. Vlada Kantona može razrješiti Savjet i prije isteka mandata, ako utvrdi da je rad Savjeta neuspješan u realizaciji poslova iz stava (4) ovog člana.

(7) Članovi Kantonalnog savjeta za svoj rad ostvaruju pravo na naknadu čija visina se utvrđuje aktom o imenovanju, u skladu sa aktom Vlade Kantona o utvrđivanju naknada za rad predsjednika i članova upravnih i nadzornih odbora.

(8) Sredstva za rad Savjeta obezbjeđuju se u Budžetu Kantona, na budžetskoj poziciji Ministarstva.“.

Član 4.

Član 12. mijenja se i glasi:

„Član 12.

(Visokoškolske ustanove)

(1) Visokoškolske ustanove su univerziteti i visoke škole, koje djelatnost obavljaju u skladu sa zakonom.

(2) Univerzitet i visoka škola je neprofitna ustanova koja ostvarene prihode koristi za razvoj i unaprijeđenje vlastite djelatnosti.

(3) Visokoškolska ustanova može organizovati smještaj i ishranu studenata, u skladu sa zakonom i statutom visokoškolske ustanove.“.

Član 5.

Član 15. mijenja se i glasi:

„Član 15.

(Visokoškolska ustanova od posebnog značaja)

(1) Javna ustanova Univerzitet u Tuzli je visokoškolska ustanova od posebnog značaja za Kanton.

(2) Posebnim zakonom, u skladu sa ovim zakonom, uređuju se pitanja vezana za visokoškolsku ustanovu iz stava (1) ovog člana.“.

Član 6.

U članu 16. stavovi (2) i (3) brišu se.

Dosadašnji stavovi (4) i (5) postaju stavovi (2) i (3).

Član 7.

U članu 17. stav (3) riječi „ , samostalno ili sa drugim osnivačem“ brišu se.

Član 8.

Član 18. mijenja se i glasi:

„Član 18.

(Visokoškolska ustanova sa sjedištem izvan Kantona)

(1) Visokoškolska ustanova sa sjedištem izvan Kantona može organizovati studij na području Kantona uz prethodnu saglasnost Skupštine Kantona, koja utvrđuje da li postoji društvena opravdanost za organizaciju takvog studija.

(2) Pod društvenom opravdanošću iz stava (1) ovog člana podrazumijeva se nepostojanje istog ili sličnog studijskog programa na nekoj od visokoškolskih ustanova na području Kantona ili postojanje potrebe za određenim kadrovima na tržištu rada na području Kantona.

(3) Nakon pribavljanja prethodne saglasnosti Skupštine Kantona, visokoškolska ustanova iz stava (1) ovog člana podnosi Vladi Kantona zahtjev za organizovanje studija na području Kantona.

(4) Odluku po zahtjevu iz stava (3) ovog člana Vlada Kantona donosi na prijedlog Ministarstva, a nakon provedenog postupka utvrđivanja činjenica o ispunjenosti propisanih uslova.

(5) Postupak iz stava (4) ovog člana provodi Ministarstvo, koje u svrhu utvrđivanja relevantnih činjenica može imenovati posebnu komisiju.

(6) Visokoškolska ustanova iz stava (1) ovog člana obavezna je za svaku akademsku godinu pribaviti prethodnu saglasnost Vlade Kantona na broj studenata koje planira upisati u prvu godinu prvog ciklusa studija.

(7) Saglasnost iz stava (6) ovog člana Vlada Kantona daje cijeneći potrebe tržišta rada za odgovarajućim studijskim profilima i stručnim zvanjima na području Kantona.

(8) Visokoškolska ustanova sa sjedištem izvan Kantona koja studij organizuje u skladu sa ovim članom, isti organizuje putem dislociranog odjeljenja te visokoškolske ustanove (u daljem tekstu: dislocirano odjeljenje).

(9) Na području Kantona može se dozvoliti rad dislociranog odjeljenja samo visokoškolskoj ustanovi kojoj je dodijeljena bezuslovna institucionalna akreditacija u skladu sa zakonom. U slučaju gubitka ili prestanka važenja institucionalne akreditacije nakon otpočinjanja rada, dislocirano odjeljenje ne može obavljati djelatnost visokog obrazovanja sve dok visokoškolska ustanova čiji je isto dio ne stekne novu ili ne produži ranije pribavljenu institucionalnu akreditaciju.

(10) Dislocirano odjeljenje posmatrano kao nezavisna cjelina mora ispunjavati sve propisane uslove, a visokoškolska ustanova u čijem je isto sastavu obavezna je za rad dislociranog odjeljenja pribaviti sve dozvole, predviđene za osnivanje visokoškolske ustanove na području Kantona.

(11) Naučno-nastavno/umjetničko-nastavno djelovanje dislociranog odjeljenja na području Kantona mora predstavljati nezavisnu cjelinu u odnosu na poslovanje visokoškolske ustanove koje ista obavlja izvan Kantona. Aktivnosti u oblasti visokog obrazovanja dislocirano odjeljenje obavlja sa studentima koji su kao studenti registrovani u Kantonu.

(12) Dislocirano odjeljenje se upisuje u registar visokoškolskih ustanova i podliježe svim odredbama ovog ili drugog zakona i drugih propisa koji se primjenjuju na visokoškolske ustanove sa sjedištem u Kantonu.“.

Član 9.

U članu 29. iza stava (1) dodaje se novi stav (2) koji glasi:

„(2) Zahtjev iz stava (1) ovog člana novoosnovana visokoškolska ustanova može podnijeti najranije tri godine, a najkasnije pet godina nakon dobijanja licence.“.

Dosadašnji stavovi (2), (3) i (4) postaju stavovi (3), (4) i (5).

Dosadašnji stav (4) koji postaje stav (5) mijenja se i glasi:

„(5) Visokoškolskoj ustanovi koja nije dobila institucionalnu akreditaciju oduzima se licenca, a ranije upisanim studentima visokoškolska ustanova obavezna je omogućiti završetak studija na drugoj visokoškolskoj ustanovi i na odgovarajućem studijskom programu.“.

Član 10.

Član 31. mijenja se i glasi:

„Član 31.

(Ovlaštenje akreditirane visokoškolske ustanove)

(1) Akreditirana visokoškolska ustanova ovlaštena je da dodjeljuje akademske stepene i diplome navedene u njenom aktu o akreditaciji.

(2) Dužnost akreditirane visokoškolske ustanove je da svakom licu kojem dodijeli akademski stepen ili diplomu, izda diplomu i dodatak diplomi ovjeren pečatom visokoškolske ustanove.“.

Član 11.

Iza člana 51. dodaje se novi član 51a., koji glasi:

„Član 51a.

(Nespojivost funkcija u visokoškolskim ustanovama)

Funkcije rektora, prorektora, direktora, dekana ili prodekana na visokoškolskoj ustanovi ne može istovremeno obavljati jedno lice.“.

Član 12.

Član 56. mijenja se i glasi:

„Član 56.

(Posebni slučajevi odgovornosti u visokoškolskoj ustanovi)

(1) Nosioци funkcija u visokoškolskoj ustanovi i članovi akademskog osoblja imaju naglašenu društvenu odgovornost.

(2) U slučaju kada je zaposleniku visokoškolske ustanove određena mjera pritvora u krivičnom postupku, rektor univerziteta, odnosno direktor visoke škole kao visokoškolske ustanove obavezan je donijeti odluku o suspenziji tog zaposlenika do prestanka trajanja mjere pritvora.

(3) U slučaju kada je protiv zaposlenika visokoškolske ustanove potvrđena optužnica za krivična djela podmićivanja i protiv službene i druge odgovorne dužnosti, krivična djela protiv spolne slobode i morala ili za druga krivična djela za koja se može izreći kazna zatvora veća od pet godina rektor univerziteta, odnosno direktor visoke škole kao visokoškolske ustanove obavezan je donijeti odluku o suspenziji tog zaposlenika do okončanja krivičnog postupka.

(4) Za zaposlenika kojem je izrečena kazna zatvora u trajanju dužem od tri mjeseca, rektor univerziteta, odnosno direktor visoke škole kao visokoškolske ustanove obavezan je donijeti rješenje o prestanku radnog odnosa i jednostrano raskinuti ugovor o radu danom pravosnažnosti presude bez poštivanja otkaznog roka.

(5) Sigurnosna ili zaštitna mjera zabrane vršenja poziva, djelatnosti ili dužnosti izvršavaju se danom pravosnažnosti akta kojim je mjera izrečena.

(6) U slučaju iz stava (2) i (4) ovog člana nosiocima funkcija u visokoškolskoj ustanovi prestaje mandat.

(7) Odredba stava (3) ovog člana shodno se primjenjuje i na nosioce funkcija u visokoškolskoj ustanovi, u kojem slučaju organ nadležan za njegovo imenovanje i razrješenje donosi odluku o suspenziji, te odluku o imenovanju vršioca dužnosti na period do šest mjeseci. Takvo imenovanje se imenovanjem istog ili drugog lica može ponoviti, ali u svakom slučaju takva imenovanja ne mogu trajati duže od perioda koji je suspendovanom licu ostao do isteka mandata.

(8) Tokom trajanja suspenzije zaposleniku, odnosno nosiocu funkcije u visokoškolskoj ustanovi pripada naknada plaće u visini od 50% osnovne plaće isplaćene u mjesecu koji je prethodio suspenziji.

(9) Zaposleniku, odnosno nosiocu funkcije u visokoškolskoj ustanovi koji je bio suspendovan u skladu sa stavom (2) i (3) ovog člana pripada razlika iznosa između naknade plaće primljene po osnovu stava (8) ovog člana i punog iznosa osnovne plaće ako krivični postupak protiv istog bude obustavljen pravosnažnom odlukom ili ako pravosnažnom odlukom bude oslobođen optužbi ili je optužba protiv njega odbijena ali ne zbog nenadležnosti.

(10) U slučaju iz stava (2), (3) i (4) ovog člana, sa licima koja na visokoškolskoj ustanovi nisu u radnom odnosu, ali su angažovana po osnovu nekog drugog ugovora, visokoškolska ustanova je obavezna po saznanju postojanja takvog slučaja, bez odlaganja, ugovor jednostrano raskinuti.

(11) Lice koje je pravosnažno osuđeno na kaznu zatvora u trajanju dužem od tri mjeseca za neko od krivičnih djela iz stava (3) ovog člana ne može se angažovati po osnovu ugovora o radu ili nekog drugog ugovornog odnosa na istoj ili drugoj visokoškolskoj ustanovi na području Kantona.

(12) Visokoškolska ustanova je obavezna donijeti rješenje o prestanku radnog odnosa i jednostrano raskinuti ugovor o radu zaposleniku koji je u postupku prijave na konkurs/oglas predao dokumenta ili izjave za koje se naknadno utvrdi da nisu vjerodostojni, odnosno da su lažni.

(13) Visokoškolska ustanova vodi evidenciju lica iz stava (2), (3), (4), (6), (7) i (10) ovog člana.“.

Član 13.

U članu 73. stavovi (1) i (2) mijenjaju se i glase:

„(1) Visokoškolska ustanova može za izvođenje nastave izabrati u naučno-nastavno/umjetničko-nastavno zvanje i angažovati lice bez zaključivanja ugovora o radu, u skladu sa uslovima i na način koji se bliže uređuje statutom, s tim da statutom ili drugim općim aktom visokoškolska ustanova može urediti kada se ovako angažovana lica nalaze sa njom u sukobu interesa, te koje su pravne posljedice sukoba interesa.

(2) Lice iz stava (1) ovog člana ima pravo prijaviti se i učestvovati na javnom konkursu za izbor nastavnika ili saradnika sa zasnivanjem radnog odnosa.“.

Stav (7) mijenja se i glasi:

„(7) Prava i obaveze lica angažovanih u izvođenju naučno-nastavnog/umjetničko-nastavnog procesa na visokoškolskoj ustanovi, u smislu ovog člana, bliže se uređuju ugovorom o angažovanju za realizaciju nastavnog procesa, u skladu sa opštim aktom visokoškolske ustanove.“.

Član 14.

U članu 86. stav (1) mijenja se i glasi:

„(1) Radi naučnog, umjetničkog ili stručnog rada, u skladu sa uslovima i postupkom određenim opštim aktom visokoškolske ustanove, akademsko osoblje može koristiti plaćenu studijsku godinu (sabbatical), s tim da istu može koristiti najviše tri puta, i to jednom u saradničkom, a dva puta u nastavničkom zvanju.“.

Iza stava (1) dodaje se novi stav (2) koji glasi:

„(2) Odsustva po osnovu odlaska na naučne konferencije, kongrese, simpozije i slične naučne skupove i kraće programe naučno-nastavne ili umjetničke mobilnosti do mjesec dana nisu uključena u slobodnu studijsku godinu iz stava (1) ovog člana.“.

Dosadašnji stavovi (2) i (3) postaju stavovi (3) i (4).

Član 15.

Član 89. mijenja se i glasi:

„Član 89.

(Prava zaposlenika izabranog ili imenovanog na javnu dužnost ili profesionalnu funkciju)

(1) Zaposleniku visokoškolske ustanove izabranom, odnosno imenovanom na neku od javnih dužnosti u organe Bosne i Hercegovine, Federacije Bosne i Hercegovine, kantona, grada ili općine i zaposleniku izabranom na profesionalnu funkciju u sindikatu, prava i obaveze iz radnog odnosa, na njegov zahtjev, miruju.

(2) Pravo iz stava (1) ovog člana zaposlenik visokoškolske ustanove ostvaruje u skladu sa odredbama Zakona o radu („Službene novine Federacije BiH“, broj: 26/16, 89/18 i 23/20 – u daljem tekstu: Zakon o radu).“.

Član 16.

Član 90. mijenja se i glasi:

„Član 90.

(Prestanak ugovora o radu akademskog osoblja po osnovu godina života i staža osiguranja ili po osnovu godina staža osiguranja)

(1) Akademskom osoblju prestaje ugovor o radu sa visokoškolskom ustanovom na kraju akademske godine u kojoj je u skladu sa Zakonom o radu ispunio uslove za prestanak ugovora o radu po osnovu godina života i staža osiguranja ili po osnovu godina staža osiguranja.

(2) Izuzetno, visokoškolska ustanova može donijeti odluku o zadržavanju u radnom odnosu nastavnika u naučno-nastavnom zvanju redovnog profesora za još najduže dvije akademske godine nakon što ispuni uslove za prestanak ugovora o radu iz stava (1) ovog člana, pod uslovom da postoji nastavna potreba za njegovim angažmanom, uzimajući u obzir nastavnu potrebu za napredovanjem izabranih viših asistenata, te sveukupne naučne/umjetničke reference nastavnika.

(3) Odluku iz stava (2) ovog člana, na prethodni zahtjev nastavnika upućen naučno-nastavnom vijeću i na prijedlog naučno-nastavnog vijeća, donosi senat visokoškolske ustanove.

(4) Akademsko osoblje kojem je prestao ugovor o radu iz razloga propisanih stavom (1) ovog člana, zadržava naučno-nastavno/umjetničko-nastavno/nastavno zvanje do isteka izbornog perioda koje je imalo u trenutku prestanka ugovora o radu, odnosno trajno ako se radi o naučno-nastavnom/umjetničko-nastavnom/nastavnom zvanju redovnog profesora/profesora visoke škole.“.

Član 17.

U članu 114. iza stava (4) dodaje se novi stav (5) koji glasi:

„(5) Nakon što izgubi statusa studenta koji se finansira iz Budžeta Kantona u skladu sa stavom (4) ovog člana, student zadržava status redovnog studenta koji se sam finansira do okončanja ciklusa studija i pri upisu narednih godina do okončanja ciklusa studija plaća puni iznos školarine.“

Dosadašnji stavovi (5) do (10) postaju stavovi (6) do (11).

Član 18.

U članu 140. u stavu (2) u tački a) iza riječi „propisima“ dodaju se riječi „u cijelosti od strane osnivača“.

Stav (3) mijenja se i glasi:

„(3) Plaće, naknade plaća i druge naknade zaposlenika javne visokoškolske ustanove utvrđuju se u skladu sa općim aktom visokoškolske ustanove koji donosi upravni odbor uz prethodnu saglasnost Vlade Kantona.“

Član 19.

Član 143. mijenja se i glasi:

„Član 143. (Nadzor)

(1) Nadzor nad provođenjem ovog zakona i propisa donesenih za njegovo provođenje vrši Ministarstvo u skladu sa zakonom i drugim propisima.

(2) U vršenju nadzora Ministarstvo može, s ciljem pribavljanja i utvrđivanja relevantnih činjenica i okolnosti, u svakom konkretnom slučaju, zatražiti od nadležne inspekcije vršenje inspekcijuskog nadzora i provođenje radnji u skladu sa zakonom, kao i dostavljanje izvještaja o utvrđenom činjeničnom stanju.

(3) Visokoškolske ustanove obavezne su u smislu stava (1) i (2) ovog člana dostaviti sve tražene informacije i dokumente potrebne za vršenje nadzora Ministarstva i nadležne inspekcije.

(4) Nadležna inspekcija za obrazovanje je obavezna, do polovine oktobra tekuće godine, dostaviti Ministarstvu izvještaj o izvršenim inspekcijuskim nadzorima nad radom visokoškolskih ustanova za proteklu akademsku godinu.

(5) U izvještaju iz stava (3) ovog člana obavezno se naznačavaju vidovi, oblici i načini kršenja ovog zakona i drugih propisa iz oblasti visokog obrazovanja, utvrđene pojave i problemi u oblasti visokog obrazovanja, te predlažu mjere i aktivnosti koje bi trebalo preduzeti za preveniranje i otklanjanje eventualno utvrđenih nepravilnosti.

(6) Nadzor iz stava (1) ovog člana vrši se na način koji ne narušava autonomiju visokoškolske ustanove.“

Član 20.

Član 144. mijenja se i glasi:

„Član 144. (Inspekcijuski nadzor)

(1) Inspekcijuski nadzor nad provođenjem ovog zakona i propisa donesenih za njegovo provođenje, kao i akata i odluka tijela visokoškolske ustanove donesenih u cilju izvršenja obaveza utvrđenih ovim zakonom vrši nadležna inspekcija, u skladu sa zakonom.

(2) Kada nadležna inspekcija za obrazovanje utvrdi nepravilnosti u radu visokoškolske ustanove ili njene organizacione jedinice, shodno utvrđenom činjeničnom stanju izriče jednu ili više upravnih mjera, i to:

a) naređuje da se utvrđeni nedostaci ili nepravilnosti otklone u roku kako je određeno zakonom ili drugim propisom, a ako takav rok nije propisan postupajući inspektor samostalno određuje primjeren rok;

b) naređuje visokoškolskoj ustanovi preduzimanje određenih radnji i aktivnosti radi potpune i pravilne primjene zakona, drugih propisa i akata donesenih na osnovu ovog zakona;

c) zabranjuje preduzimanje daljih radnji za koje smatra da su u suprotnosti sa zakonom, provedbenim propisima i drugim aktima donesenim u cilju provođenja ovog zakona;

d) poništava upis studenata u prvu godinu studija preko utvrđenog i odobrenog broja,

e) poništava upis studenata izvršen suprotno zakonu;

f) izdaje prekršajni nalog;

g) podnosi zahtjev za pokretanje prekršajnog postupka;

h) preduzima druge radnje i aktivnosti za koje je zakonom ili drugim propisima ovlaštena;

(3) Upravne mjere izriču se rješenjem, protiv kojeg se u roku od osam dana od dana prijema istog može izjaviti žalba Ministarstvu.

(4) Odredbe ovog člana shodno se primjenjuju i na visokoškolske ustanove koje studij na području Kantona organizuju putem dislociranih odjeljenja.“

Član 21.

U članu 150. u stavu (2) tekst „i (10)“ zamjenjuje se tekstem „(10) i (11)“, iza riječi „zakona“ dodaju se riječi „a koji studij nisu okončali do kraja akademske 2019/2020. godine“, a tekst „2019/2020.“ zamjenjuje se tekstem „2024/2025.“

Iza stava (5) dodaju se novi stavovi (6), (7), (8), (9), (10) i (11) koji glase:

„(6) Ako lice iz stava (4) i (5) ovog člana ne okonča studij u roku propisanom stavom (4) i (5) ovog člana istom prestaje status studenta, o čemu dekan fakulteta/akademije donosi rješenje.

(7) Lice iz stava (6) ovog člana ima pravo na prethodni zahtjev nastaviti započeti studij, uz obavezu plaćanja dodatne participacije i/ili školarine, o čemu rješenje donosi dekan fakulteta/akademije.

(8) Odluku o visini dodatne participacije i/ili školarine iz stava (7) ovog člana donosi upravni odbor, uz prethodnu saglasnost Vlade Kantona.

(9) Zahtjev iz stava (7) ovog člana podnosi se najkasnije do kraja akademske 2020/21. godine.

(10) Pravo na nastavak studija u skladu sa odredbama stava (7) i (9) ovog člana student može ostvarivati do kraja akademske 2024/2025. godine.

(11) Nakon isteka roka iz stava (4) i (5) ovog člana, zahtjev iz stava (7) ovog člana podnosi se za svaku narednu akademsku godinu, najkasnije 30 dana prije isteka tekuće akademske godine.“.

Dosadašnji stav (6) postaje stav (12).

U dosadašnjem stavu (6) koji postaje stav (12) tekst „2019/2020.“ zamjenjuje se tekstem „2021/2022.“, a na kraju stava iza riječi „godine“ dodaju se riječi „ , s tim da ovaj rok Ministarstvo može prolongirati posebnom odlukom, ali ne duže od akademske 2024/2025. godine.“.

Član 22.

(Obaveze visokoškolskih ustanova sa sjedištem u Kantonu)

(1) U roku od tri mjeseca od dana stupanja na snagu ovog zakona visokoškolske ustanove sa sjedištem u Kantonu uskladit će svoju organizaciju, rad i opće akte sa ovim zakonom.

(2) U roku od 60 dana od dana stupanja na snagu ovog zakona upravni odbor javne visokoškolske ustanove obavezan je donijeti akt kojim će utvrditi visinu dodatne participacije i/ili školarine iz člana 21. ovog zakona.

Član 23.

(Imenovanje Savjeta)

U roku od 60 dana od dana stupanja na snagu ovog zakona Vlada Kantona će, na prijedlog ministra, imenovati Savjet iz člana 3. ovog zakona.

Član 24.

(Donošenje posebnog zakona)

U roku od 18 mjeseci Vlada Kantona će predložiti Skupštini Kantona zakon iz člana 5. ovog zakona.

Član 25.

(Licenciranje studijskih programa i upisivanje dislociranog odjeljenja u registar visokoškolskih ustanova)

(1) U roku od šest mjeseci od dana stupanja na snagu ovog zakona visokoškolska ustanova sa sjedištem izvan Kantona koja organizuje studij na području Kantona dužna je licencirati studijske programe koje izvode u momentu stupanja na snagu ovog zakona i podnijeti zahtjev za upis dislociranog odjeljenja u registar visokoškolskih ustanova.

(2) Visokoškolskoj ustanovi koje ne postupi u skladu sa stavom (1) ovog člana nadležna inspekcija za obrazovanje zabranit će dalji rad na području Kantona.

(3) Rješenje iz stava (2) ovog člana je konačan upravni akt protiv koga nije dopuštena žalba, ali se može pokrenuti upravni spor.

(4) Studijski program koji ne dobije licencu iz stava (1) ovog člana ne može se dalje izvoditi, o čemu Ministarstvo donosi rješenje koje je konačan upravni akt.

(5) Za potrebe licenciranja studijskih programa i upisa iz stava (1) ovog člana, u roku od tri mjeseca od dana stupanja na snagu ovog zakona, Ministarstvo će sa ovim zakonom uskladiti Pravilnik o postupku licenciranja studijskih programa prvog, drugog i trećeg ciklusa visokoškolskih ustanova na području Tuzlanskog kantona („Službene novine Tuzlanskog kantona“, broj: 7/17) i Pravilnik o vođenju Registra visokoškolskih ustanova u Tuzlanskom kantonu („Službene novine Tuzlanskog kantona“, broj: 11/16).

Član 26.

(Korištenje slobodne studijske godine)

Akademskom osoblju koje je slobodnu studijsku godinu (sabbatical) koristilo po ranijim propisima, u ukupan broj korištenih slobodnih studijskih godina (sabbatical) iz člana 14. ovog zakona uračunavaju se studijske godine koje su korištene u skladu sa ranijim propisima.

Član 27.

(Finansiranje javne visokoškolske ustanove)

(1) Odredba člana 18. ovog zakona u dijelu finansiranja bruto plaća, naknada plaća i drugih naknada zaposlenika javne visokoškolske ustanove primjenjivat će se najkasnije počev od budžetske 2022. godine.

(2) Za lica koja su bila zaposlenici javne visokoškolske ustanove u periodu 1992.-1995. godina, a kojima ugovor o radu prestaje u skladu sa članom 94. tačka c. i d. Zakona o radu, neplaćeni doprinosi za penzijsko i invalidsko osiguranje za taj period uplaćivat će se iz sredstava osnivača shodno stavu (1) ovog člana.

Član 28.

(Uređivanje statusa studenta na javnoj visokoškolskoj ustanovi)

U roku od 15 dana od dana stupanja na snagu ovog zakona, javna visokoškolska ustanova uredit će status studenata dodiplomskog studija iz člana 150. stav (2) Zakona o visokom obrazovanju u skladu sa ovim zakonom, sa svim pravima i obavezama studenta.

Član 29.

(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

Bosna i Hercegovina
Federacija Bosne i Hercegovine
TUZLANSKI KANTON
Skupština

Broj:
Tuzla,

Predsjednik
Skupština Tuzlanskog kantona

Sladjan Ilić